

東文選

一百十五

内閣文庫	
番號	漢 17777
冊數	130 (115)
函號	116 1





東文選卷之一百十五

青詞

乾德殿醮禮青詞

金富軾

強名爲道妙物曰神藏用窈冥不與聖人之患闡
幽造化若有真宰之功動不屈以施爲感遂通而
降格眷言涼德嗣守丕基雖欲體春秋之一元以
貞王道未能用洪範之五事以奉天時民業未至
於永康歲望屢乖於大有思惟不德恐懼靡遑庶
幾受祉於神明得以保和於邦域遂據科式灑清
闕庭薦酌彼之潢汙望泠然之仙馭伏望至誠上

達冲鑒俯臨使予一人永享康寧之吉及我元子
允宜福履之綏田野稔而盜賊消戎狄懷而干戈
戢普推餘澤燕及蒼生

又

真常之極非可道而可名恍惚之中若有物而有
象固難意致宜以誠求伏念臣邈然幼冲職是司
牧撫躬自戒曾無滿假之心臨事不明莫適榮懷
之慶萬民胥怨一氣屢乖災變之興殆無虛日兢
危之慮凜若涉淵按寶籙之妙科潔玄壇之淨醮
伏望悃衷上格道蔭丕臨調精稜於二儀協陰陽

於四序兵其不試民無金革之憂農用有年家有
京坻之積

又

道非常道蓋自古以固存神之又神於其中而有
象包含衆妙統制群生念惟眇躬夙恭洪造奄有
一國于茲三年顧無善政遺風曷副三靈之望恐
有寃刑濫賞致傷二氣之和或天辰失常或山石
告異軍民懷艱食之患夷狄有佳兵之謀不德所
招何心自處雖禍福之應倚伏無常而禳禱之文
科儀具在虔遵道法載潔醮筵潔水澗毛苟有信

誠而可薦天心地意豈以菲薄而不應其妙眷之
丕臨借靈光而旁燭蕩諸災變介以吉祥富壽康
寧施作吾人之利兵凶疾疫免為我國之憂仰望
聖神俯垂照鑒

又

崔惟清

妙道難名孰居無事至仁徧覆善貸且成輒敷悃
款之誠上冒聰明之鑒伏念臣猥蒙先業叨據重
權德既寡於升聞道亦微於旁燭懼或召陰陽之
沴故常軫宵旰之勞屬當蕃毓之時未浹霑濡之
澤側身修行亦允蹈先王之規作善降祥尚丕承

上帝之命式清秘殿恭按真科仰瞻彤甕之威用
薦祈禳之禮伏冀靈光下濟陰陽潛通俾消災孽
之萌茂委休和之貺條無聲而風順塊不破而雨
周慶洽九農福均四海

又

金克己

化不化生不生自然而已為無為事無事疇覺爾
哉臣以無良主茲有衆雖欲晨興而宵寐無忝所
生迺緣德薄而位尊罔知攸濟踈矣象龍之致雨
殆哉商鉅之馳河非賴提撕曷勝負荷涓上春之
良展中範之寶科胡臭亶時方瀝齊明之素惟

誠能動倘符正直之聰伏望加以眷憐赦諸愆咎
年壽等揜椿之久本支同葛藟之絲萬寓康寧有
鑿井耕田之樂三邊靜謐無飛藹輓粟之勞

上元青詞

李奎報

道固宅於希夷迎隨不見神若存於恍惚禍福無
常念眇眇之資臨元元之衆克艱王業居多夕惕
之心寅奉天威恒有日臨之畏况屬群仙之校錄
宜邀上帝之保持恭按真科式嚴淨黜仰真冥然
之聽優加惠我之私擁茨福之方將求于多享保
蘿圖於可以展也大成

冬至太一青詞

金克己

深之深神之神返一無迹大以大小以小吹萬不
同宜叩至虛用祈洪造伏念臣叨受帝心之簡久
持王業之難憲天聰明雖虧時又之德基命宥密
尚畏日監之威選嘉候於周正揚茂科於漢時脩
黃汗之薄薦聊表蟻誠想紫宙之靈遊倘垂鴻應
伏望福隨陽長禍與陰消三光全而塞暑平和氣
充塞百姓悅而國家阜頌聲沸騰

又

李奎報

變化無方常善救物吉凶不僭職竟由人苟傾祈

叩之誠即荷畀矜之賜伏念以予過舉召厥咎徵
當盛寒之戒時有恒燠之爲沴况雰霧崇朝而閉
塞或雨潦連日以浸滯寔深兢灼之懷佇借高明
之佑伏望陰陽常順無冬愆夏伏之災符瑞竝臻
有天降地升之貺

乾興節太一青詞

金克己

獨往獨來故疑於獨有常生常化皆出於常無宜
叩窈冥之精少酬生養之德伏念臣叨膺帝簡忝
作君臨雖居莫大之高尚服無疆之恤如集于木
敢忘惴惴之懷若隕于淵常抱兢兢之慮擬德眷

佑終向康寧矧臨載夙之辰宜丐惟新之命茲隳
中悃敢叩上靈視無見聽無聞雖云冲邈臨在旁
質在上固已感從伏願電掃千殃雲屯百順康寧
好德永擁無疆之休逸樂延年丕承有秩之祐

王本命青詞

視無形聽無聲固難測度况有象忽有物猶可攀
依念一么軀膺三重器常思艱而圖易不知所裁
欲向吉而背凶何飾而可但承善教能保求圖丁
本命之靈辰按妙科於寶典盛張法醮虔屈眞遊
藥闥珠宮雖宅窈冥之域瑤軒玉輅想臨芬苾之

筵伏望過落墨編功加黃籙祛殃逐咎永消虎尾
之憂疑保命延生終嚮龜齡之悠久

又

李奎報

大道爲陰陽之祖人所由生上天司造化之權工
而不宰眷惟眇質夙託真麻受命無疆惟休靈承
帝事俾予從欲以理簡在天心茲臨元本之辰益
佇高明之眷按冲科於三洞祇藏精裡邀仙仗於
九霄覬歆薄禮純誠所格孚佑遙加泮渙優游保
身宮之帖泰熾昌耆艾享壽籙之延洪

北斗青詞

天清而上鼓一氣於混元斗轉于中括萬生於下
界厥監不遠有信可羞顧惟冲眇之軀叨荷艱難
之寄神所勞矣雖非愷悌之資命不易哉尚畏高
明之鑒况彼泠然之馭適于降止之辰宜罄頌悰
仰徽玄福按冲科於仙籙嚴法事於靈壇惟冀高
真俯歆卑素降年有求騰玉籍以長生垂裕無窮
保羅圖於不拔

年交道場兼醮詞

窈冥莫測道無古而無今消息不停年有終而有
始念臣微薄襲位艱難夙夜憂勤猶未安於一日

陰陽推代况欲及於三元宜憑佑下之私用集履
端之慶茲泐仙籙聿峙法壇邀羽服之高流諷琳
編之秘蘊仰惟靈鑒迺昇真庥頓消未兆之災若
冰將泮丕擁惟新之福如日方昇

福源宮行誕日醮禮文

鄭誦

初獻

載生載育聿臨彌月之期不愆不忘冀獲上天之
祐庶紆饗假優借昇

亞獻

克罄精忱予惟執禮愈謹庶寬再濟天其申命用

休

三獻青詞

洪範五福以壽爲先蒼天九重唯誠可格輒忘卑
陋僭瀆高明伏念統承先王尹茲東土曷乃因於
朝覲雖得荷于龍光未能施德於人民皆懷怨讟
不知獲戾于天地每軫憂危矧當震夙之辰尤極
依歸之懇庸涓琳館載肅瑤壇伏願上帝垂仁列
真委貺有秩斯祐奚獨享於一時無疆惟休亦克
延于後世

神格殿行中元醮禮文

初獻

臨下有赫孰知不測之神應天以誠或動蓋高之
聽庶乎降鑒予以昇忱

亞獻

冲鑒不隔實丕應於群祈誠心有加尚何嫌於瀆
禮奠歆苾苾申錫穰穰

三獻青詞

日月不居又值中元之屆天人無間庶馮一念而
通伏念位于克艱德則不類雖云玉覲為可亦念
我行不來惟吉凶悔吝之生例因乎動庶齋戒沐

浴以祀永孚于休爰際群仙考核之辰敬馳千里
祈禳之請敢云眇眇獨享於尊榮奠與元元悉期
於康樂

下元醮青詞

李穀

初獻

履秦正之紀望適屬朝元酌周濼以薦誠敢希注
福奠垂寶鑒優錫純禧

亞獻

蒼蒼無極道已先混沌之前蠢蠢有生命不外陶
甄之內敢竭由中之信用資佑下之私

三獻

抱氣含元曲借生成之便考功紀過潛行禍福之
權盍罄卑棕仰干聰聽伏念恐德不類莅事惟煩
猥承積累之餘得爲民牧未見側脩之效可享天
心茲當校錄之辰采極斐忱之畏謹邀鶴侶恭奏
龍章伏願頓解愆尤俾有自新之地優加壽錄坐
膺難老之期

近冬至甲子醮青詞

甲子紀辰已近陽生之候乾元資始益彰天覆之
仁式殫明享之誠敬佇曲成之惠念膺祖構叨襲

王封召水旱之不常旣由涼德使歲時而無易惟
借陰扶茲值良辰恭陳法醮高靈下墮諸福畢臻
致令十日雨五日風淳風復于今日三年耕一年
食餘食踰於昔年

小王本命醮青詞

初獻

日周六甲當小王貽命之辰時罄一心修上帝享
誠之舉蘋蘩可薦黍稷非馨

亞獻

視之不見孰知陶鑄之功感而遂通能藉照臨之

惠敢申昭告庶格明禋

三獻

天無親而輔德命不易哉父有子而主恩心乎愛
矣切惟元嗣間襲丕圖雖因謙退之情遂成恭默
恐有虞憂之念反損和倪茲卜元辰特開清醮儻
枉泠然之馭居歆酌彼之儀致令存其心存其誠
克諧以孝俾爾富俾爾壽永孚于休

祈雨太一醮禮青詞文

權近

初獻

天自民而視聽所欲必從月離畢以滂沱其應甚

速庸修淨醮佇沐真庥

二獻

道得一以最尊默幹生成之化禮至再而彌敬敢
殫昭格之心茲勤仰止真借霈然

三獻

天無私而德是輔常聰明而降監人有失而妖由
興盍恐懼而修省俯殫丹懇仰叩玄機顧以寡躬
叨承景緒為政以德尚知夙夜而祗勤莅事惟煩
寧免賞刑之僭濫斯繇戾氣之感召以致咎徵之
荐臻旱魃為災春不雨夏不雨而大甚螟虫害稼

苗亦食葉亦食而卒瘁慟先祖之于摧故靡神而
不舉雖云祈禱之遍罔獲報應之彰纔萋萋以興
雲旋杲杲而出日且當耘月而電集既損農田况
值梅天而雪來尤駭人聽豈惟禾黍之盡槁乃至
草木而皆焦是雖係人事之有愆恐亦虧天心之
生物予小子之否德固當被譴罰之加彼庶民之
無辜何忍視飢饉之至每念此而隕涕寧丁我而
受瘡簡在帝心宜爲民請佯越道殿恭展醮儀儻
欸欸之誠格明明之鑑致令妖氛頓釋甘露普霑
四時行百物生天道順而不忒六府修三事理民

生厚而益隆嚮歛福於箕疇過歷年於周鼎

功臣都監誕日醮禮青詞

初獻

視不見聽不聞默斡神化進思忠退思輔豈報君
恩庸修星醮之嚴冀枉雲輶之降

二獻

道本一致固無聲臭之名誠至再勤自有感通之
理茲陳薄奠敢祝遐齡

三獻

星辰居所令萬物以生成臣子盡心祝一人之壽

考至誠斯切靈貺即臻伏念臣等俱以庸材幸遭
盛際光依日月獲霑恩渥之私誓指山河濫與勲
名之列暨子孫而蒙慶極天地而難酬爰值誕彌
之辰益勤請祝之懇肆誓道籙恭陳醮儀伏望
主上殿下閱莊椿八千春本支既茂嚮箕範九五
福邦國永昌

六丁神醮禮青詞

於赫紫微有嚴玄武分上下左右之位如質如臨
主威福予奪之權不僭不濫茲將哀籲庸瀆聰聞
念以無良適丁多艱暗於理亂持危之術胡能有

成略於經遠保大之規罔知攸濟雖將卒盡悴以
防戍迺盜賊無憚而侵陵狗偷既恣於海瀕蠱毒
又延於陸地蔓難圖也勢孔熾而方張燎可撲乎
事將非而莫救方懷畏尾之意恐有噬臍之憂矧
由水旱之相因以致公私之俱乏曷故恒賜之爲
咎至於今日而猶然民靡孑遺何忍老羸之轉壑
君誰與足實慚寡昧之爲邦慄慄若殞于深兢兢
如履其薄唯設溪毛之薦仰邀雲馭之臨儻賴神
休獲安國步致令兵塵汎掃時雨滂沱千斯倉萬
斯箱終善且有一曰壽二曰富俾熾而昌

靈寶道場青詞

初獻

臨之上質之旁洋洋如在誠於中形於外斷斷無他真枉冷風俯歆行潦

二獻

庶右享之瞻昊天而敬仰再斯可矣酌潢汙而益虔來燕來寧俾昌俾熾

三獻

無聲無臭粵道難名有始有終惟誠爲貴事之以禮感而遂通念以眇冲叨承付畀顧五年之踐祚

無一日之安心兵之精強外寇深入而無憚人懷疑貳內訌屢生於不虞大邦責貢而莫効螳誠遠國遣使而安知狙詐室如懸磬豈聞紅腐之陳陳民靡有黎可嘆赤立之子子興言及此深用惻然既失撫養之仁愧居司牧之任是當自責豈在他求矧凡咎徵之臻皆由不德所召宜側躬而修行以轉禍而爲祥茲按真科式嚴淨醮伏願卑懇上奏明神降監綱紀四方措邦基於不拔本支百世受帝祉於無疆文武和同遠近交附更闡絃歌之化不聞金革之聲

親試文武科合行本命醮年例通行青詞

卞季良

天星濟生曲垂陰隲臣子祝壽惟以至誠祈叩苟
勤感通即邇伏念弟子臣某等踈庸賤品魯鈍微
資學豈通方才非禦侮何期 聖神之親試濫與
文武之魏科况躡華聯而陞峻秩恩實同於覆載
罔知津涯報則乏於絲毫采增戰汗寔稽仙家之
蘇聿求淨醮之文每當本命之辰庸切永年之祝
恭惟 主上殿下聰明睿智剛健粹精奉天之心
敦乎克敬愛民之政發於至仁等 祖而篤孝思

事大而虔侯度爲君之道曠古無倫宜承保佑之
申益擁綏將之慶臣言非誣靈鑑所知伏望特賜
顧歆優加密護致令 主上殿下既多受祉如松
栢之方新於萬斯年與乾坤而並久年登國阜兵
戢時康

福源宮太一移排別醮禮青詞

新邑旣成式嚴玉宇孟秋方屆恭迓瑤軒冀諒頽
悰特垂玄佑猥將否德叨據丕基民未底於永康
歲屢乖於大有臨深履薄恐獲戾于帝心招福弭
灾常有望於陰隲寔邀冷馭迺安新壇儻升聞於

杳冥度降監於菲薄伏望神所勞矣天其佑之求
蠲洪範之咎徵若冰斯泮茂擁卷阿之純嘏如日
方昇

北斗醮禮青詞

彼蒼者天縱無聲而無臭維北有斗能降祥而降
灾念惟冲眇之資叨襲重艱之寄兢兢若隕克存
寅畏之心斷斷無他佇仰高明之佑茲丁彌月聿
峙法壇儻蟻忱之昭升而鴻應之不僭致今箕範
之咎徵冰泮周詩之純嘏雲臻享眉壽於萬年其
寧惟求令本支而百世受福無疆歲稔時康民殷

物阜

三清青詞

皇矣三清能度人於存歿誠哉一念當與天而流
通輒貢卑悰敢干睿聽伏念曩在洪武之季而丁
戊寅之秋念宗社之將危且死生之相迫賴蒙陰
騭雖免剥床之灾乃傷考心竟抱終身之痛每泣
血而何及庶悔罪以自新仰思祖宗之靈容有滯
於冥漠俯慮臣民之衆豈無失於平康何以致一
門之克昌何以使萬物之咸若紛乎此念萃於眇
躬冀霑洪造之加庸遂小心之願昭格爲殿旣嚴

穰檜之儀塹城有壇又謹春秋之醮此國典之常
爾於余心猶慊然茲即所居式營小宇以爲瞻禮
之所而列肖像於中靜夜沉沉儼乎臨之左右名
香馥馥凜然對越神明豈惟望賜於方來蓋亦謝
恩於已往伏願至尊垂憫諸聖興慈諒余積忱憐
余內訟致令先考先妣解脫幽都之苦趣亟赴朱
陵陪叅仙侶之真游常居紫府先世沉魂均被高
明之佑悉登快樂之鄉大小群生之晏寧本支百
世而興振

昭格殿行雨雹山崩久雨雷震心星犯月太

白晝見月犯南斗之魁祈禳兼消灾度厄太
一醮禮青詞

初獻

時丁七月道宇惟清日值中元醮筵斯展庶輸蟻
懇獲屈鸞驂

亞獻

高高在上窺度末由斷斷由中感通奚阻冀歆信
薦曲借慈庥

終獻

上天閔下謹告孔明小子遇灾祈傾惟謹念承丕

緒思致小康敬天勤民雖每觀於古訓發號施令
豈皆適於時宜又况視聽之所未周念慮之所不
及紛然刑訟寧無冤抑之鬱陶邈矣田間恐有榮
獨之流碎寔積感傷之氣以召變異之多隕雹非
時且山崩之可懼恒雨害稼復雷震之不寧心星
既犯於月行金曜胡爲而晝見又告大陰之次乃
入南斗之魁夫豈徒哉而示災之至此必有以也
盍防患於未然載替洪範之庶徵皆本人君之五
事則當自責不可他求然悔往而追來諒予心之
所勉顧轉禍而爲福豈人力之攸能茲克深於戰

兢而且切於禳禳式循道錄庸時法壇仰惟杳默
之精俯致提撕之力致令群灾冰泮純嘏雲臻身
其康強久享盈成之業民用和睦永消僭忒之萌
干戈戢而四方寧風雨時而五穀熟

北斗青詞

三清在上嘿斡生成北斗居中實司喉舌茲殫蟻
懇用丐鴻休伏念曩者我太祖失豫而彌留有
權臣挾幼以謀亂祗欲保於性命隨即致其剪除
雖宗社以之而底平於親心由是而不獲常有纏
膺之恨矧當晏駕之餘時復沉思不勝感愴唯念

草創之不易盍謹持守之惟艱寔克深於戰兢庶
有賴於孚佑披肝瀝膽仰干有赫之臨宥過釋愆
俯諒無華之悃致令先世祖禰各承超度之恩下
土臣民均享吉康之慶保一門於有永膺諸福之
畢來

大陰獨醮青詞

列宿失行莫非譴告大陰示變架切虞憂寔罄頌
綜敢干玄佑竊觀上下之相感捷於影響之無間
頃有日官之言月犯心前之曜茲乃屬於儲副盍
亦勤於禮禳蓋由人事之過差益見天心之仁愛

雖沉思其所以不敢違寧竟難燭於未然祗增惕
厲式稽道錄恭峙法壇致令灾萌雪消福履川至
乾文克順求蠲致異之徵國本惟隆茂迓無疆之
慶

昭格殿行祈雨兼流星祈禳太一醮禮三獻

青詞

初獻

孟秋方屆恭峙法壇行潦雖微冀紆靈鑑苟勤祈
叩宜獲提撕

亞獻

道無常體冥杳難知人有至誠感通斯速茲殫懇
款再瀆高明

三獻

出異示灾實是天心之仁愛轉禍爲福惟因道力
之扶持念惟微未之資叨據重艱之寄自即位以
至今日雖居安常不忘危謂小康之可期何乖氣
之致異流星失度厥徵于何不臧旱魃爲災有粟
吾得而食邦人由是而大恐日官以之而獻言豈
可他求惟當自責蓋由敬天勤民之未至抑亦發
號施令之不便又况庶官之多烝民之衆播刑折

獄豈無冤抑之莫伸盛暑祁寒當有老羸之失所
是皆予德之不類宜得天譴之荐臻第哀萬姓之
何辜求慨三農之無望徹膳去樂惟知業業以如
雷瞻天望雲其乃杲杲之出日寔深兢惕庸切禳
祈冀賜歆容優加扶佑致今求蠲義經之悔吝將
樂將安坐同周雅之滂沱既優既渥年登國阜兵
戢時康

昭格殿行祈雨兼星變祈禳醮禮三獻青詞

初獻

祇取初宵醮筵斯展洞酌行潦仙馭是邀冀枉真

遊曲加歆顧

亞獻

道無常體窺度末由人有至誠感通即邇茲殫懇
款再瀆高明

三獻

天心仁愛昭示休咎之徵品物流形惟賴雨暘之
若爰承譴告盍致祈傾念以眇躬襲此丕緒爲宗
社臣民之所寄且天地鬼神之有臨敢不殫心
知獲戾今茲七年之已改顧無一日之或違每遭
久旱之相仍克深寅畏况值孟秋而太甚采劇戰

兢諒飢饉之存臻望山川其如滌豈唯側身而自
責或至失眠而忘殮又聞日官之獻言乃告金星
之現晝遇灾而懼罔知所爲茲豈人力之可圖實
惟帝心之所簡寔稽金籙恭峙玉壇嗚呼昊天嘿
斡生成之柄瞻仰烈宿咸垂扶佑之私致令陰陽
和而風雨時旣優旣渥人民育而弓矢戢將樂將
安諸福畢來四方無侮

摩利山塹城醮禮三獻青詞

暮春涓吉恭展醮筵行潦雖微可紆靈鑑寔殫卑
懇以枉真遊

亞獻

三清道秘冥杳難知再獻誠深感通斯速庶垂歆
顧優錫保持

三獻

山浮海上迥隔塵寰壇峙雲間合邀仙馭茲勤祈
叩用巧提撕念惟微末之資叨襲重艱之寄明明
赫赫固知惟命之靡常業業兢兢敢忽爲君之不
易寔克深於寅畏恒佇仰乎高明爰潔冲科以資
陰隲冀諒由中之信曲垂佑下之仁致今悉蠲箕
範之咎徵將安將樂茂擁羲經之介福曰壽曰康

兵戢時和年登物阜

祈雨昭格殿行醮禮青詞

人事感於下天變應於上天人感應之理歌惟顯
哉予以寡昧承上天之陰隲襲 太祖之丕基期
底小康蓋有年矣今當盛農之月乃遭旱乾之災
深惟其故不敢遑寧豈可他求惟當自責予以閔
氏兄弟四人中宮至親置諸兩府俾享尊榮不期
秉心不忠反生疑貳乃畜不忠之心謀剪宗支情
狀已著爲日久矣尚且不忍舍垢匿瑕閱歲七改
予於其時爲心之難上天所知蓋其得罪宗社不

敢終宥並皆自盡此以宗社之計君臣之義裁之也然未知果合於上帝之心歟又念功臣之或誅或放者皆其秉心不忠情見乎外自取之耳非予故有憎惡之心而濫施罪責也然亦未知果合於上帝之心歟至若土木之役則蓋以此都 太祖所建而朝房行廊全然未成士無所止工無所寓此皆不得已而營建然於興作之際豈無民弊凡此數者予之所以獲戾乎上也今承譴告栗栗危懼敢具自責之由以瀆蓋高之聽嗚呼以予一人之故億兆之衆先懼其害以至飛潛動植舉失其

育言之至此良用惻然仰惟昊天俯諒微誠赦過宥罪俾銷災咎雨暘以時百穀用成家給人足民安物阜不勝至願

昭格殿行雷電流星祈禳醮禮三獻青詞
初獻

時丁季秋敬涓良夕庶輸蟻忱於淨醮得枉鸞馭之真遊優借顧歆曲垂扶佑

亞獻

含貞藏密窺度末由薦敬叩虛感通即邇茲瀝無華之悃冀紆有赫之臨

三獻

謂天蓋高雖絕形聲之驗惟人所召必示休咎之
徵爰承譴告之加盍致祈傾之懇念予眇質襲此
丕基帝命難謀宜篤緝熙之敬民情可畏當施博
愛之仁吾斯二者之未能其敢頃刻而罔念况聞
日官之有告乃陳氣律之不調既奔雷之非時復
流星之示譴沉思熟慮亦難燭於未萌悔禍產祥
唯仰憑於陰隲寔誓金籙恭峙玉壇苟至誠之昭
升何災兆之不弭致今天時順度茂凝位育之祥
國勢如盂坐擁盈成之慶四方無侮諸福畢來

北斗解恠醮青詞

尹淮

初獻

繫妙道無聲無臭雖莫測希夷惟明信可薦可羞
庶有感格俯殫衷未仰達圓清

亞獻

求福不回夫豈容於祈禱至誠無息第采竭於寅
恭冒賁綠章顙蒙洪造

終獻

出灾異以譴告蓋緣仁愛之心對威命而戰兢式
展欽崇之禮輒輸忱悃敢瀆高真猥以庸愚獲承

艱大顧政治之多辟召陰陽之不和再震雷於八
九月之交已巳乘秋令大雨雹於數百里之內復損
田禾矧已巳夜惟月之行犯蒼龍宿好風之度變
恠迭見於旬日修省曷懈於斯須爰峙靈壇肅陳
淨醮遙垂孚佑曲借居歆致令潛消既往之愆將
安將樂密介方來之福俾熾俾昌臻六氣於四時
保三韓於千載

下元日行通州太一醮青詞

初獻

時當陽月卜下元之令辰地愜良方邀上清之真

馭肅陳淨醮祗薦純誠

亞獻

明昭在上常加孚佑之私誠敬由中再瀆蓋高之
聽冀紆歆顧曲借真庥

終獻

惟天爲大縱聲臭之莫求體物不遺惟感通之可
必念將眇質叨襲丕基心常篤於戰兢其難其慎
誠益殫於瞻仰惟時惟幾適值始冰之辰式嚴行
潦之薦倘微忱之昭格庶洪應之遄加致今朝野
清寧永絕邊塵之警宗祊鞏固載同磐石之安

東文選卷之一百十五

東文選卷之一百十五

山崎闇斎
 門人
 ...

